

STORY BY IKIRHEP, CONTINUED FROM TAPE 12, SIDE B

Iwe manekewe rhoapwut ra igin itto iuriuta ii waa we ra igin keer pwe ra fangnganir anner pisgit, iuniumeer cola iuniumeer supwa. Iwe irr akamwoiu raiura pwe resoapw iun patto pwe repwe iunmi rhag supwa na supwan Saipon igiwe. Iwe raiura pwe supwa na supwan Saipon ina aipwe iunmi pwe ina supwa mwu aw changwowuw pwe aw pwe foatgi sefanii Saipon, aw pwe noa rhungi Saipon reen, iwe aw pwigito, ina panisu. Iwe ra pwigi supwa pwuw kewe, rhoapwut ka rasoar tiwei tugufai noa iwe nge anian kewe re iun patto pwe re arhangi patto nge irr rhoakewe ra tugufainoa reiura. Aipwe iuniumi panisu pwe ina minwu aremasan fanei refasiun iukiun me igiwe pwe supwai Saipon. Nge patto saapw supwai Saipon pwee aise iukiun minna igiwe. Ina minna supwai Saipon ina panisu. Panisu regai ttef niuw arheo rheon supwa kewe mani ra keppan iwe a wei supwa pwuw komwu, mani ra rheen affiti noa rhag.

Iwe renoa moan me reen waa we waar iwe ra ittinong, ittinong mesai Niugerhig ra mwoito sareer mwan iwe ra itto apesa. Akapesa finefinen wai we arr. Pwe ra ittiwou, ittiwou woan Pigeneo. Ra ittiwou nonono, ra sou me Pigeneo iwe ina ra ittiwou Saipon. Iwe, meta nge reiura ese iug rhag giupwun. Arr re fanuwarh, pwigipwigi e nge an erhai naan pwan iura repwan itto giupwun reen. Iwe ra igin keer nge aia pwan igin keer woai Satawal. E keer rhoan fanuw kaan pwe reiura pwe rapwan mesaig pwe apwanong kepesai Saipon, pwe irr Reppuang ruwrhai ranoa ittiwou Saipon, anoa pwanong kepesai Saipon. Iwe a moanno noa kepesan waa we Mai Sugun.

1 STORY BY IKIRHEP

Iwe ina waa ei e mwirir rhag. Efoarh waa ie emwirir rhag ina ittan Mai Enai. Ise giunei faan Mai Enai are iga e nanai waa naan are meta. Iwe ina reiura pwe Mai Enai wa na waar. Iwe ittan capin na arr Igeoiunman. Iwe re itto pwe repwene noa Guam. Repwe sai Guam. Waa we waar ese moan, iwe ra itto pwe iwe minwe arr itto atiung apparh, toatoa yoa, fferh arr paan. Pwe ina minna paan ina egai teosangi uwai niu. Iwe nge paan minna sa yoanata woan waa iwe sia yoanata woan apparh. Iuriunoa apparh iwe sia yoanata woan. Ina ewei peon peouyeon ka. Iwe ina minna regan aita ngani pwe paan. Iwe noa moan noa waa we waan Igeoiunman nge igiwe ii a yoamoannota pwe

epwene ittiwou epwe ne noa, iwe nge noan rannin kewe re iengang iwe nge re Polowat ra keppas ngani.

Rhoapwut, osoapw noa pwe ai faiyeog pwe wa mwan nge otenoa maa noa.

Iwe nge ii eiura pwe, ipwe noa.

Iwe giupwun foarh noa rhag me woan Polowat reen mwongo. Sang foarh rhag rhoapwut. A pwigipwigi e enoa fapwong nge emoan waa we waan. Pwe a moanon engang, Moanonoa reen wi me yoa nge esan moannotiw mwo yoanongan. Enoa pwigipwigi e enoa meram we nge a moan firhnoa waa we. Moannonoa me pweerh, fai yamw. Regan iura faiyamw nge re siuweni sefani geogeon yemwan, mini kewe emiintiw woan taam iwe e imwoi sangi waa iwe e gitgit nge engatngat. Iwe aitto neogneog iwe sena kewe naiun ise giunei no itteer. Iwe ra ittiw sangi Polowat, sou neyoatsor pwigipwigi e pwongnoa masta ra noa ngani Pig. Fafoarh waa we retapwei, retapweitiw me Polowat. Iwe waa kenaan nge ise pwan giunei capinin, pwe kepesan minne ia giunei. Iwe ra itto nonono ew wiik, fuspwong. Iwe neyoatsorta nge waa we e amanuwanoa. Amanuwanoa me Pig. Raitto sang fengan me rhoakewe ee eor e regan faisong fengan nge rhoakewe renoa. Iwe irr ragai sangto me rhiun waa nge irr ragai sang wou me wenifanuw, ragan koapwong fengan. A noanoa waa we nna nganiir Guam. Iwe raitto no. Nono e ranoa tapwei nong sigogi. Iwe tapwei nong ittinong Rhuk nge renoa ittiw. Iwe irr raittiw apesa pwe aigin apwapwa sai we arr pwe ra noa noan hotel, fiti fetanei giupwun me woan Marianes. Iwe ra itta woan Rhuk. Ise giunei are repwai noa Saipon. Iwe irr re Polowat raigin keer ngani waa we waar pwe raiura pwe ii nge ina anoa Guam.

#2 STORY BY IKIRHEP

Iwe apwai nono iwe nge rapwan itiwou. Aruwouwan group. Aruwamwoiu sai. Ie sipwene pwai sefan ngani Satawal. Iwe apwan ittiwou pwan waa we Mai Sugun. Isa giunei no ittan efoarh waa fenayan Epeimwai. Iwe ina arufoarhon Mai Sugun. Reppuang capinen wa we ise giunei ittan, Reppuanglug. Igiwot capinen Mai Sugun. Iwe ra itiwou ranoa pwoiupwog wong me woan Pigeneo. Epwan igin apwapwa arr noa pwe re giupwun woai Satawal nge ra igin pin nganir mwar nge oasoapwon agupwunar nge ni nganir maniug, sino. E ra itiwou itiwou no woan Pigeneo. Ruwou wiik nge ise giunei are ra pwigi wou nimou wong are wonou. Ra pwigiwou Saipon. Re Saipon raigin mesaig. Pwongni woui nippwong. Raigin mesaig pwe ra weri minikewe pwigianwou waan fanuwarh. Iwe nge iga irr repwan mwomwongo pwigier re mwoiuwe. Irr re fanuwarhan Saipon. Pwe raigin noa keer fengan. Auwa igin arhigerhi pwe auwanoa pwoiupwog to wong mini kewe anarh

mwoiuwe. Irr raiura rhag pwe repwen fifi wong pwe repwen mwongo. Iwe irr tugfai rhoapwut tugfai mwan reigin mwongo. Anian egius arr seien mwongoto rhag pwe reiura pwe ewei pwe rekoi soar neow. Pwe irr a mangmang nganir, taan wong nge a wei rhag taar maneka re maa me maneka re tinengi upweer. Iwe irr reiura saapw, ewen noa. Iwe nge irr reiura apw. Iwe tipami nge amam aipwe mwongo.

Iwe arr itiwou eigin apwapwa. Ranoa reen igiwe waa we enoa iamaan e. Iwe isegan iurata mwo nge Reppuangnap renoa iamaan e. Iwe regan iura pian Woanang. Ina woai Saipon. Ise giunei no are eno Arepwan igiwe are Woleai. Iwe ina irr waa kena mwir repwan itiwou, second group iwe rapwan itiwou pwan iamaan me e. Raigin keer pwe ra igin itiwou pwoiupwog naiur senapii nge pisagir pwe irr ranoa pwai. Turis rafang panuwer. Iwe irr ranoa tou fetan raitto fang fetan nipeer, ameomeo. Iwe irr ra pwiigi senapian. Turis raitto anganir re pwai, anongan minika turis re feori me reer nge ina nge irr re pwiigi senapian.

Iwe raigin mesaig. Igin noa ittiwou pwoiupwog marearer mwan pwai rhoapwut. Iwe nge irr rhoapwuton Saipon me mwan pagunworhan Satawal raigin mesaig.

Iwe irr mwani Saipon resepwai song pwe irr nge iga re ew rhag. Ew fangan rhag. Iwe irr mwani Saipon rafar anganir pwe repwe rhoan imw noa reer, woai Saipon. Pwe irr nge pwai re Saipon rhag.

Iwe nge irr raiura pwe, yoa ie aipwennoa pwoiupwog fetan marearemam. Iwe ra pwiigipwiigi e meram enuw, iwe nge ranoa ittinong a ngawnoa pwe nang a niir. Waan lgiwot anoa itto me yeoriun Satawal, waan Reppuang anoa itto me yeoriun Elato. Iwe enaan pwan itto Satawal. Iwe renoa itto nge rapwan igin itto apesa ununun Saipon nge apwapwa. Iwe mwan tugfai rhoapwut tugfai ragan igin keer nge faiyeor noa. Meta auwagan itiwou itiwou nge ina eigin taaw Saipon, nge aw amamaw wou pwe nang epwenoa torigami me e nge aw pwenoa woasnoa. (Minne iukiura woasnoa ew kepas assirow, nganir rhoaka re chemaw noa. Iwe ina ese mwen pwe sipwe anganir rhoaka re chemawnoa. Ina mwo saapw perhangiai nge re chemaw noa nge iura pwe iwe ra woas. Nge are maneka re kittiw nge siura pwe ra maa.)

Iwe ikina minika ipwan giunei reen ununun waa kewe re ikkit wou Saipon ie ia fiyoangei nong. Iwe nge ew me ew isoapw iura pwe ikkei rhag nepan minika igiunei ikka ia iuranong. Iwe.

#3 SONG BY IKIRHEP

(Iwe ipwen pwan ani ew poan. Poan en nge poanon iuriuriun waar panuw. Ina poan en nge epwan igin eor faan. Ina ipwen ani iwe nge.)

Eganeogneog saiwe an Panuwnap, sai tewarer.
Epwe soatona mwo mettewan Faiew toafi amw gaiu.

(Ie eiura pwe e aneogneog waa naan waan Panuwnap. Eiura pwe):

Epwe soatoni metewan Faiew

(Iwe ina eiura pwe epwe agina metewan Faiew. Ina kepas e soatoni, kepesai Rhuk, nge agina kepesan Satawal). Epwe soatona mwo metewan Faiew atirrow pigiri opwe row upwuta.

(Eiura e atirrow nge e pigiri aiu we an nge erow upwuta.)

Atirrow pigiri nge erow upwuta epwe aingiu sawi ete pwos noan.

(Iwe ina eiura pwe epwe pigiri aiu naan nge erow upwuta iwe nge epwan oapwupwu sawi.)

Opwe aiungiu sawi noai su metaw.

(Iwe ina aiura pwe opwe oapwuw sawi naan pwe opwe sugi metaw. Iwe ina minne sugi metaw ina auwa wewe ren pwe ewei pweta iga si suginoa asaman ew imw iwe sia tonong noan. Iwe ina, ina wewen pwe ina esugi metaw naan.)

Epwe aiungiu sawi nge esu metaw epwe mworh metewan. Sia serag rewe sipwe giut fanuw noamwoi tani yoan.

(Iwe a soapw iei.)

#4 SONG BY IKIRHEP

(Ipwen ani minnei, ew pwai iwe nge pwan pwai noa rhag ne metaw. Pwan uriur rhoa e ata repwan repia egius pwan kepesai sesserag fetan. Iwe ina ipwene pwan ani ew ina regan iura pwe siun porow. Siun porowun serag).

Efich raan manna ma gotiw angini amwu serag.

(Ie eiura pwe emwamwai raan. Nge emwamwai me yeotiw angini amwu serag).

Etai moch panuw ganeme sai na.

(Ina eiura pwe a mwamwai raan. A mamwai me yeotiw angin panuw naan. Iwe nge esa mwarh no panuw we pwe a menan, apak pwe epwen wai rhag.)

Eiuru amwu serag ma ngachei neo toapw.

(Iwe ina eiurtiw saina an me areon ew neo pin.)

Sa pisag chewou noani toaur fan.

(Iwe ina eiura pwe a pisag saiwe an nge a rhewou me noan toaur we. Ina eiura toaur fan ina mani toaur ka armas rese gan mimmin nong noan. Rhoakka regan iura re pwurinoa niugiun pirheer rese ikkito noan.)

Nge eworawou aniu manman we.
(Iwe ina a woriwou aniun waai we.)

Aniu mana we naiuch pwe esiu me wei roangoni waan.

(Ina eiura pwe a woriwou aniun waai we pwe a siu me woai roangtam we an. A iu me woai roangtam we an.)

Pwe a siu me wei roangono waan e moanupwonup chog. Gotochu noa gamenai ganemai tiper.

(Iwe ina eiura pwe efanwou nge a moanuponup, awei pipi.)

Sar rhefeotiw epiungu pwa yoaroiut checheni metaw.

(Iwe ina apiung pwe ata ii worhow ka yoaroiut. Minika agius rhag rhaniun. Worhow ka egan piung nge ese pwan igin tounap ika egan agius rhag.)

#5 SONG BY IKIRHEP

(Ipwen aninong pwan ew uriun senap. Ra ngata minne uriun pwe eigin mwamwai fena yan, nge eigin fan mera. Ie ipwen mena minneen nge ie awpwe iaisaning me woan.)

Ewe sortan ia monunu pwe aiuteginoa ai mamaw.

(Iwe ina noan ew soran nge a manunu nge a itaginoa an mamaw.)

Ememesiwesiw penipenin mai na arr re ieraw.

(Iwe a iei mwemweiunoion toon penipenin mai we. Ie sigai taaw nge sia rongrong, ei, ei, nge ina sigin taaw. Iwe ina minna moiunoiunto)

Teo worhai senap fan an tigtig.

Epwene isata apeo rhigini mera.

Epwe sassa waa na Main Angiununong.

(Iwe ina eiura pwe epwene apeo firhii waa we pwe epwene yoarosata. Epwen apeo firhii meran an fargit satin esoapw me esoapw. Regan iura, fargit satin esoapw me esoapw mani, isegiunei iga reer senap nge ise giunei are ese moan fenfenan. Iwe a iurata minwe ittan waa we, ie epwen itta me igan pwe.)

Epwe sassa waa na Main Angiununong main angiunuwou.
Angiunawou woan neamas.
Angiunanong woai nigesemas.

#6 SONG BY IKIRHEP

(Iwe ipwen pwan ani ew poan, poanon waan waai.)

Gaimin finn pwunapei gaifar gagsiu mwo reer.
Gangani wini metaw resor pwe sari gemwar etai ffat an pipi.

(Reiura pwe, ate. Aten, sar gemwar mani re nainai ngani naiur. Ina kesan peigitiw minne, eiura pwe.)

Resor pwe sari gemwar etai ffat an pipi nge esa gomwan gotouwnong nge epwenoa monuwonuw me angi gefanien.

(Angeka e manuwonuw me ang fanian fetan. Ie enoa efang enoa yeor eitta yeotiw eittiw netow.)

Angi gefanien nge geramwo re panuw nge retewai pwane gasi nge ina ii eweri e emwega nge eirhie eipweri me noan mann nge epwuri seo moanup.

(Iwe ina eiura pwe esoar; resoapw mwanienii ngani pwe ina ii nge eweri. Ina eiura pwe eipweri me noan mann pwe efarag noa noan mann anoa weri. Ina minna eipweri me noan mann, ese pwuta wenpeigin nang pwe an farag. Farag wou noa ittiwou weri me peigi yeor enoa ittinong nge e faragitiw noa ittiw pipii me mesoar.)

Nge epwuri seo moanuppo eteiti mwanienii.
(Iwe ina ii nge esan mwanienii mwo.)

Eteiti mwanienii e pwe erhuwei rhap rhag sekiut manutoiuto nge efiti geratuot.

(Ina eiura pwe erhuwen no rhag ew manuwonuw nge erhuwen fiti ew arraniut noan minne. Iwe ina ii nge esan mwanienii pwe esan fiti tipan.)

Nge ina ii e eweri e emwega nge e irhii eipweri me noan mann nge epwuri seo moanuppo eteiti mwanienii, pwe eteiti fiti tipan.

#7 SONG BY IKIRHEP

(Ipwe ne pwan ani ew keon, keoniun ne metaw)

Neogneog waai Safineotag wanuwarh waneo rengas eneoguru sare goapworh.

END OF TAPE 13 SIDE A.

TAPE 13 SIDE B

SONG BY IKIRHEP (CONTINUED FROM SIDE A.)

Me tapuere aneo marheng pwe repwe gonoa naimotaw koaonopage amwoa mwer pwe mesamwan amwo kapuer nge ete ta natipuomam nge epueteo fei. Pakorhak pwe mesamwan amwo kapwer nge karhefeo naimotaw opwen paiefang rhak serefi chiefan amu metaw pwe re chepen.

(Ipwe ukunoa mo me ikan pwe ipwan anganikami mo ew, pwe ina fan mina eura pwe opwen paiyefang tiw, itan fiu e a apesa me ikei pwe aura pwe opwen paiyefang tiw serefi chiefan amwo motaw pwe re chepen ngarhane yaan, iwe ina ikkei raw ikka raw minikka rengata. Mani ewenwen an serak to waa naan woan.) Ngarhen yaan o mwen makuf Safinotag pwe afaiekus rhag nge orhu me yoamw konnam nge opwe kupwun neyoanowas nge re sochu neyoatopan busag woene towar pwe effi pwe poti engan nge makuf Safinotag okanekur sare goapwor pwe opwe gonoa naimotan omwen makuf Safinotag o mwen ma, iwe iwe enet O etogo Safinotag.

#8 CHANT BY IKIRHEP (IUMAWAI RAGIRH)

(A ie ikina ie ipwene aninong ew iumaw, re kan iura pwe itan iumaw ei nge rekan iura, rakirh, iumawai Rakirh).

Ekaneokoneok mwan me noai neitinong sipwene iura mo warh wei Rakirh.

(Ie iura pwe re aneokoneok mwan me nan utuna itan Neitinong ew wut minne itan Neitinong, ina repwene iuru itan wa naan ina Rakirh.)

Sipwe iura mo wach we rakich sipwe puereta mo re pwe irhuroang, roangei, inane pouta epwe pouta mo epiteweirek.

(Iwe minikka iani ikina nge ise kunei minne iy pwe mani inaanpou mani itan erhai fai, ina eura pwe innaan pou epwe poiuta mo api teweirek, ew toaur, ise kunei toauran ikine iy ee)

Inaanpouta epwe pouta mo api teweirek, siserefi nigosu sipwe osukumesa piniseiti makur.

(Ie minnei nge isekunei minikka apuai tota me ikei pwe mani kepesan mouwe, ise kunei fan, minne iy)

Emmake wawe nuki nemwairek emeriprip sewin.

(Iwe ina auwa kunei ew pwe ina eura pwe emak wa naan, nukun ikina reura nemwairek ee).

Emak wawe nuki nemwairek emeriprip sewin niukun ananguw.

(Iwe ikunei pwe sawi nan are emarip iwe nge ananguw nan ise kunei, anangun ikine iy ee)

Emeriprip sewin nukun ananguw, isap akefat ika eso ee.

#9 STORY BY IKIRHEP

Nge ie ipwene rhapiyta ikina nge ew fiyoang, fiyoangon wong me remmam, pwe ina minne repwan kan iseni reen armas, pwe safori minwe iwe nge sisoapwan feori sefani, pwe ina opwan feori sefaniy ikine ngare wa mwoarhou ew min, are, nge wa puaisefan ngani iwe nge opwene maa pwe reura pwe wa wei wong, wong esefan ngani rhak toon.

Iwe nge amaa pwe apwan sefan ngani apperouwan, iwe ina minne fiyoangon wong ina, eura pwe iy rhoan weynang. Rhoakena aigunei sangir, wong re weyinand. Iwe raito nonno weiyang iwe nge a ngata tipwan pwe eppwene kut naiun. Iwe a kutt naiun a noa iwe nge enoa pwikisangi erhai punuwan, iwe epwe songota erhai, erhuwen peosepa rhag iwe anongeuwan amakenekena noa ewan, ina minne ifiyoangei nong ununun

fiyoangon wong me remam pwe aupwan kan kunei, iwe tippan pwe epwe pwaun anan mwongo. Iwe mwet ngani ew kamma kan are ew sapiy kewe sapian ikiwe iwe rekan iura unong, iwe rhen pikiri ngani rhag rhen roporopiy noa rhak, iwe raiura pwe eis, onowe Nukainang aura pwe aune mwoito en simingoaror pwe aupwene ito aroara meta minne sipwen feoringani oneen. Iwe en onomu Onofat. Onofat man rugurug, nge ese rugurug, eikin kukune anongan meta, Iwe ina ittan Onofat. Iwe onowe raito, raito mangi minne repwe feori ngani onowe wong. Raito nomma noa paun, ese mwarh nganir, iwe amenan epwen atoaroporopa nang we. Iwe onowe Simingoaror a aroara meta repwe sefan ngani iwe nge arhip tipan onowe wong. Iwe nge onowe Onofat aura pwe ngang, aune nigiti nganiai pwe ngang, iwe onowe Onofat aito nge aura pwe onen, ee, meta. Omenan opwe nini armas ren?

Sapw ina en onowe awito pwe aupwe feotakiniai noa rhapin irawe, iwe au feotakiniai noa ataina nge ise mwarh nganikami. Isoano neir, isoano neir, rhokewe re feotakinuk ie ifar noa rongrong nge ia ito pwe iura pwe wong marearei. Iwe nge meta aunoa feotakiniai noa ren, aupwe fitei?

Ina Wong ina efasun tiwekin pwe aikan marear me Wong. Iwe onowe aiura, Yok, ennet mauwerh, ya, pwe a tubunoa fan onowe pwe onowe Onofat napenoan man pwan saw yoatupwutup . Ie aikin pan ikina saw mismis. Ina aruouwan atubtub ew pwai saw mismis.

Iwe onowe a, ito en pwe sipwenoa kopiy minna ai, sipwenoa kopiy sapiy na ai nge siaito fena, pwe sipwe ito mo mwongo otokena anai noan, ina esoarno an manna punuwai sapiy, pwe eiura meta iy minnaan?

Iwe nge onowe a angani pwe, Wong, osoappwan aineo pwe sipwe noa sianoa kopiy iy ira na yai, ina yai sapiy. Inaan fasiun minna fasiun mouweto mouweto nge re yaya, iwe ie waweri igina pwe minikei nge sapian mouwe saapw mininaan feor iwe nge ipwenenaan feori ew pwe suwenin sapiy na an Nipiroag. Pwe ina Nipiroag itan manwe punuwan onowe Onofat.

Iwe onowe aura pwe iwe nge reen met nge sipwene yorh noa. Iwe ranoa, ranoa iwe ranoa kopiy rakirh we noa fenafena onokowe e moan. Emoannon fanfan ngani soapan me sine pwe enoa mwitiknoa nge renoa auferato, auferato onokowe raito pwise iy sine we raito fena pwe ra agitigitinoa pwe repwen amonanoa apwigipwige, onowe iwe effeffena nge etotoutou me woan sagurun onowe apwigipwige, onowe enoa gunei pwe effirh ngani pwe agachenoa minwe nge onowe a ura, Onnan ipwe onorhapenoa mo nge wa ito rheorheoki sakeruy.

Iwe onowe Wong emista rhag onowe Onofat ewon rhapetiwi nge onowe Wong epuegi akan ita rheorheogi minwe sagrun. Imu opwe kan itengi me igomu nge onowe eitengi a noanoa ee agai tar neoneorh mini kewe rhiun onowe, nge onowe a meta kaan o Onofat?

Sapw ina minmu sigai rheorheoki sakerurh ren pwe minikina, minn gaan pwoaron arh moat, iwe ta afitei mo pwe aikin kachenoa minne sakerum, iwe mwana Wong are sagin en nge ina nge mani ipwene pwoar. Iwe onowe aiura iwe, nge onowe a meta na iwe nge opwe wonotiw. Opwe wonotiw pwe ipwai rheorheoki sakerum. Onowe ewonotiw nge onowe a merei ngani iy minnwe eura pwe an sapiy. Onowe iwe ememerei ngani nge ese kunei pwe aparh we onowe ee stampauw iwe eno areon, iwe amereito iy angkat we amerei ngani aparh we, onowe a urunong noan iy sapiy we nge a gai rheorheo woan epai, pwigipwigi e enoa moot iy aparh we nge onowe erhuwen sargita rhag sapiy we a, mmmm, atoropunguwtiw woan minwe sagrun onowe nge onowe eppeniy wong we, peniypeny atoropu nguw tiw, peniytiw nesessoan, peniytiw ie aitiw piung ne seet.

Osekan iura en pwe opwe gai nini armas woai nangiy, pwe epwene roos armesan woai nangiy, opwene noa itiw nonoa pwe en manui ne seet.

Iwe amam armas aipwe orhei fitikom iwe ie ina minne armas re uorhei fitikon wong, iwe nge wong minne paiun epwe mena ngani armas anongonuwan tinengi messan pwe ika fasun man mamauto me ikiwe.

Iwe onowe Onofat a apwuw sawi we naiun ranoa mageto, a Nugainang, e, meta pwe ipwe anganugmo ununun Wong.

Pwe efouta?

Iwe oura pwe amam me simingoaror anonganikimam nge anoa opwe kunei pwe anoa me woan fanei pwe esanono pwe sise kunei ikine anoa ee, ie asusangi fanei, esoapw mwenei rhimwita, sineng noa rhag nge esoapw mwenei rhapenoa.

Pwe met?

Meta o onnan pwe ngang ina ikai ruta ren mwaniam. Iwe nge ew ata ikan ikin ngas enanaita pwe ina manmu ia ikin mesagun anuw pwe awei pwe mangmangin erhai aniu me nerhiuy ren an saw nini pwe ememmangto rhag pwe epwe teorh song rhag woai rheen ito rhag rheen peosepayai rhag rheen ropiynoa rhag epeig ewai. E nge sapwina ifar anganiug pwe esarno pwe anoa iy, iwe nge osogopan fang rhoapwut we noaum pwe ipweno reen?

Iwe onowe aura onoa aineou rhoapwut na pwunuwai ina itan Inamenun, ina Inamenun ina itan manwe pwunuwai Nugainang.

Iwe onowe Onofat anoa nge anoa angani, Inamenun, ee, osoapw fangto rhoapwut we naimi pwe ipwe pwunuwani?

Iwe niewe akoy soar tip mwarmwar. Iwe a mee? Weti pwe isegunei tipwai Nugainang. Aia moan fesang me Nugainang nge Nugainang eura pwe ipwe no ren.

Yek iwe nge meta ipwe iura nge iy minne issesauni iwe nge imu are afangenoa kepesan nien pwe opwen pwunuwani. Woon pwunuwani.

Pwupwunuw noa rhoakewe mani epwongni rhag nipwong are onoapwong, iwe nge epwopwonoa niewe. Iwe epwopwonoa rhag nge onowe esiu ittiw nonoa fan inoan, a siu me weinang aitiw nonoa woan fanuw. Iwe aitiw nonono iwe aweri iy rhoapwut we, rhoapwut we rhoapwutoy nesessoan.

A meta naun iyo rhoapwut nan? Aineou iy mwan we regan amarear fengan. Iwe nge iy aiura pwe naun Yoon.

Yok nge esemwerhan pwe ipwe rhoan nganeani? Yek ngeta waito aineogirh O wonen, sinoa kiunei, nge wonowe anoa tingoarei wonowe Yoon.

Aura meta itan rhoapwut we naiun? Iwe onowe aiura pwe, meta itan nge ie esoar itan pwe ie ipwan iura rhag pwe naun Yoon. Ei, Yoon, ose mwerhan pwe ipwe no rey Naun Yoon? Meta isoapw mwerhan reen. Meta mo armas, gattu, goanuf, saufang, guus, anongan mesmesan maan mo nge are tipan pwe epwe ito noo rei nie nai. Iwe ipwe nganei pwe rhoan nganean, ngang ise gekoapwut armas. Ie ifar wenei ou ikina.

Ek amoan. Onowe ito rhag nonoa rei niewe. Enonoa rei niewe pwan pwongoni rhag nipwong minwe nge pwan pwopwonoa. Iwe raiwe ar nigafitag niekewe, pwe niwe weynang earheinoa ew meram nge niwe epwigi pwe mereman. Iwe are an arruou iwe nge niewe iwe ennan ew mereman. Iwe nge an ainuw iwe nge niewe nian nesessoan we an arruou. A pwigipwigi ee, makenoa niewe pwe onowe aita amakenoa niewe. Makenoa rhoapwut rhoakewe perhangian onowe Onofat. Pwe onowe Onofat anoa umwuwto niewe mwengean me niewe inan, re apwutar rhoawe. Niewe Inamenun eapwuta pwe repwe itinong affamwa rhoapwut we naun.

Iwe epwen itiw faaninoan nge onowe aiura pwe ina isoapw nonoa rhag me ikei nge auwa giuta aitiw nessoan. Ina eyor pwunuwai nesessoan. Nge rhoapwut na pwunuwai me nesessoan nge iamesmesa nge erhai man ikin mwamwai. Pwe emwamwai nganikirh. Pwe mwamwai nganiai nge mwamwai nganikami. Iwe rhoakewe raura pwe emeta pwe ete pwan wey rhag mannen nge amam aia sipegin saaw, aia saaw pwe aipwene ito pweiupwogto mwongo, rhoapwut e inan arhei wou, ese mwerhan pwe aipwe tonong noan minikewe kien atewe naum. Pwe eura pwe ese tetengag amam pwe aipwe tonong noan minna kien atena naun. Iwe ina minne ie orhungikemam to nge ai tarotaro annew pwe aino fetan rhag faan piungun orhou me karr tiw anet, ina ie iffar angani kami a augunei pwe naiu nge auwa itiw, auwa pwoupwogtiw ami ammot, pwe ie epwene naiu nge ie epwene menaw manwe rey.

Onowe eitiw nge rhoakewe masta rhak nge rhoakewe renoa itiw, noa itiw nge reitiw fengan pwe ra mwoi ngani niewe nge niewe pwunuwan Yoon, a, ey meta?

Niewe Nimwarfarwa aiura awito, ausoapw moat ikina aw arheitiw rhag minikomu arh ikina nge auwa totomo igaan pwe aupwe itomo nunu minika amot, iwe nge aw arheinoa

minikina pwe sipwapw itiw amota, pwe ie asemwai rhoapwut we naiurh. Iwe niewe anoa, noa foarh niewe. Aiura tonong ren pwirhen. Iwe niewe atonong ren niewe Nimwarfarwa. Akan en minmu opwe amwarhiu upwan rhoapwut mwu noaum. Pwe itan pwe nai nge a noaum.

Iwe nimwun iy epwe itto no ika urhuwan pirhe. Nimwu mwengean Onofat. Iwe aw mereou ami niekka. Niekka wen perhangian Yoon, pwan ami niekka pwiw aupwe mereow me arron pwe sipwe afferar nong mauwerhekka. Iwe niekewe ra itinong nofetan nge agekkai.

Iwe pwigipwigi ee menawnoa niewe, menawnoa erhai mwan. Nge manwe weinang nge erhai rhoapwut. Iwe ra aitangani pwe Annaunesoan. Iwe nge iwe weynang nge iwe eitani pwe Annaunwoainang. Raito nonno ee tetemoak. A rhoapwut niewe weynang, iwe nge onowe apwan anian. Onowe Onofat aiura pwe wa mangiy o onai nessoan.

Mee?

Mangiy pwe opwe ita ukkur weynang, ien me ien minne ote faiyoapwut ren. A fenauw wonowe naun. Agukkunei pwang, agukkunei peoi sarr, nge koanun faai, meta moka anongan mesemesan nge onowe enganei, rongoyan. Apotopotan messer.

Iwe nge a oteorh gan memmenatiw mo inoumaw mu yam opwe foakon waretu weinang niu kaan nge offerhi rhag nge o atingiy ngani rhag againiu nge o unumi, pwan pwaipwai nge offerhi rhag ngari rhag epeig nge opwan arhei ngani againiu kena epwe tinengi, ese iei, wou nge ogopiy rhag egius meren, rhaan nge o yoagusutiw, yoagusutiw minika eito rhag nukunupan an, e wamangiy pwe repwe iura, opwenoa rongrong erhai rhoapwut pwe Anaunwoainang iwe nge wamangi pwe opwe rhen pwigu rhag pwe pwunuwam.

Iwe nge onowe aiura. Pwe meet?

Ina, rhoapwut nan ina naii me weynang, nge ina isoapw nainai iy, nge isoapw pwupwunuw no nina inan. Inamenun. Rhoakena imu reikin ngaw nganir manekomu inoam. Ei, iwe raiura, meta, niewe Nimwarfarwa aiura tipami rhag are aipwe naini atemwu naimi are ami aupwe naini. Ipwe naini pwe mwan upwan. Noa niekewe perhangian onowe Onofat pwigino, pwigita weynang.

Iwe anoa nofetan weynang. Nofetan weynang nge onowe iaisaning rhag itan rhoapwut we, apwigipwigi, ee, onowe againoa ito fan ugkur. Rakan, Anaunweynang, nge onowe akan minfetan ee nge onowe fatapw nge rapwan ee Anaunweynang ito tonong faan aus ee, ee onowe efatapwnoa nge enoa minngani ew iy aus we nge enoa sargi, noa sargi nge ese, rongrong itan niewe nge eteo sefan ow iwe nge niewe apwan towou me faan ew aus. Nge rapwan, Anaunweynang, nge a ee nge onowe a arap ngani, epwen ikei rhag me epwe remw. Ra ito tonong fan aus we pwe enoa sargita nge onowe etapwei nong mwirin pwe eitong moatonoa arron, a, Anaunweynang?

Ee, en iyo?

Ngang, ogunei pwe opwene towou rhag nge wa mangi pwe opwene siu.

Pwe mee?

Opwenoa wetiai ren niu kenan pwe sipwene rhoan ngane. Iwe niewe renoa rhag tapen ie sikan agikin, ie rekan iura iwe aw akagin, min minmu eno fan aus, min minmu eno fan aus, ina tapen urr na reani. Iwe niewe enoa rhag sefanito nge towou rhag niewe nge enigfatapw noa reen ikiwe onowe eiura ee. Onowe epwene mwetenoa en rhoapwut ie ogan moatonoa rhag. Sa siu. Su rhag nge onowe eiura, sisoapw no ikina.

Nge iya?

Sipwenoa won reen mana inai. Pwe sipwen siu gachenoa sia pwupwunuw.

Iwe niewe aiura, iwe nge reen efout. Iwe fatapw noa ranoa woon noa ee enoa neyoatosor, raito guta niewe esoano. Niewe Inamenun a angani onowe rhoan nganean, onowe Nugainang. Nugainang opwe apwuw sawi pwe repwe magto re fanei pwe esanono rhoapwut we naiurh. Nge mane epwigi nge a ura apwigi. Nge ranoa mwoito. Mwoito nge onowe minwe e amwirmwiro. Ew niu efoat messan iy wut we, an iy onowe Nugainang. Yeorh mani ew minne faun nge ie, niu ikin mworhmworh pwe si yu rhag sia ferhiy. Esoar ne ekan gogkotepa, nge eitiw minikewe umwumwun itiw ffan me pwon. Iwe raien arr ey aw itimoangei manne epwegi rhoapwut na nau samwon e arh.

Onowe foakkon mwetomwetto reen niu we, yeorh angetai efai minwe mena ferhitiw rhag nge a aopom, iwe nge essarhei ngani nang. Sarhei ngani nang nge onowe epwegi rhag yeorh tarre piunguw tiw rhapiy niu we. Iwe nge onowe e angetai ew. Angetai ew nge epweniy tiw rhag nge etarpiunguw ngani agai niu we, unmiunmi nge etera ta woai niu we. Iwe a gainoa ufanong, meta aw mwoiyon feori aunoa pwunuwani inami komwun me semmami?

Iwe ra ew epwan atinnap imwun mwan oo, ta auwa moat, nge ause pwigi ngani pwe meet?

Ata samwon ee arh ekan amwirhakirh nge iwe. Ra eis ew rheri ngani mwanna fena, onowe fena enoa rhag sugpwaii, iseni punguw ngani nge onowe angenoa rhag nge enifitiy minne menan, pwunuw noa minne ewan nge onowe eitiw pwuri, a meta o inounmwai tami komwun, meta auwa no rhag reen? Aw weri ie man mit we ami ie ipwene atoropwiriya noa. Atoropwiriya noa a onoa itiw neset opwenoa nonno pwe en rhoan mwomwongon fanigat. Iwe nge ra meta omoat ngani reen oo tag?

Aw rheri punguw fenganiy me awkang, onowe tag me awkang sugpwaii rhag nge ra iseni punguw ngani, onowe etornoai rhag nge e pwigi rhag iy menai nenwe tiegnita me faan paiun iy manwe, pwai tiegnita me faan paiun awkang nge e amwarhur rhag satirtiw, aw noa itiw no pwe ami manniu faan inoan ami mani ngaw, aw pwenoa itiw mwet fetan woan satin fanuw komw faan, ne soan.

END OF TAPE 13